

Bail à Loyer: Gesetzesprojekt an der Kritik

25. Feb 2021 - 14:00

D'Mietgesetz muss dem Locataire d'Méiglechkeet ginn ze iwwerpräiwen, ob de Loyer korrekt berechent gëtt, seet d'Chambre des salariés. De Gesetzesprojekt vum Minister Henri Kox iwwer de Bail à Loyer misst nogebessert ginn.

Carole Schimmer / tt



Foto: picture alliance/dpa

Am Gesetz iwwer de Bail à Loyer vun 2006 stoung schonn dran, datt de Loyer maximal bei fënnf Prozent vum investéierte Kapital dierf leien. Dëst gouf zu engem Ament festgeluecht, ewéi d'Zënse méi héich waren ewéi haut.

CSL: Berechnung vum maximale Loyer änneren

Et gëtt dowéinst vill méi potentiell Investisseuren, déi um Immobiliemaart present sinn, well se hir Sue besser wëllen uleeën ewéi um Bankkonto. De Maart ass iwwerhëtzt, an déi Fënnf-Prozent-Reegel huet och een Impakt op d'Loyeren, warnt de Claude Roeltgen vun der Chambre des salariés.

Dowéinst wier et hinne wichtig, d'Berechnung vum maximale Loyer ze änneren. D'Prioritéit dierf net de Rendement vum Investisseur sinn, mee "datt d'Loyere rëm an eng Linn bruecht gi mat der Kafkraaft vun de Locataire".

Am Mietkontrakt, sou ewéi de Logementsminister Henri Kox dat virgesinn hat, kënn drastoosch, datt de Loyer maximal bei fënnf Prozent vum investéierte Kapital pro Joer dierf sinn, mee de Proprietär muss net dra präzisieren, wéi héich dee Capital investi iwwerhaapt ass. Et sinn och keng Sanktiounen virgesinn.

De Gesetzesprojekt gesäit iwwerdeems fir, datt e Proprietär bei enger Wunnegemeinschaft, net méi Loyer fir eenzel Zëmmer ka verlaangen ewéi wann nëmmen ee Locataire an där Wunneng géif liewen.

All d'Noriichten an Emissionen an der 100,7-App

Syicol: National Mietkommissioun opsetzen

Den Emile Eicher, President vum Syicol, sträicht och ervir, datt bei Gebaier, déi eng duebel Funktioun hunn, et schwéier ass, de Capital investi nozevollzéien.

Besonnenes kritisches ass d'Chambre des salariés vis-à-vis vum Henri Kox sengem Gesetzesprojekt, well de Wäert vun enger Wunneng, op deen de Loyer ka berechent ginn, bei enger Donatioun oder Ierfschaft séier an d'Luucht geet.

De Syicol hätt gär, datt d'Gemengen am Virfeld Bescheid wéisse vun enger Locatioun, sou datt een den Zoustand vun der Wunneng kéinte kontrolléieren, seet den Emile Eicher.

Wichtig wier et och, datt d'Mietkommissiounen op de Leescht geholl ginn an datt eng national Mietkommissioun agesat gëtt. Doduerch kéint ee fir regiounsofhängig Koherenz, méi Routine an zousätzlech Sécherheet suergen, esou den Emile Eicher.

Zu den Avisen vun der Chambre des salariés an dem Syicol iwwer d'Reform vum Mietgesetz wëllt de Logementsminister Henri Kox sech fir den Ament net äusseren. Et géif een d'Diskussioun net op Basis vun engem Avis féieren.

Et muss een deemno ejo ofwaarden, wéi sech d'Chamber par Rapport zum Gesetzesprojekt iwwer de Bail à Loyer vum Henri Kox positionéiert.

